



09972

明孫傳庭撰

疆事十可商疏

題爲廟算當一無不忌疆事向十有可商敬抒愚見恭請聖裁事  
自流氛煽亂殆閱十年發難之初賊勢甚小我兵日勦而賊勢益  
大今用樞臣楊嗣昌之議復措餉二百八十萬集兵十二萬付之  
督理及臣等各撫臣以圖大創謂滅賊在此一舉矣儻任事諸臣  
繇今之道迄無變計臣恐今之措餉二百八十萬豈多於向者已  
費之幾百十萬哉今之集兵一十二萬且不逮向者見調之九萬  
矣廟堂苦心而籌豈可再供一番嘗試而天下事又尙堪再誤乎  
臣不爲臣等身家慮而爲朝廷封疆慮蓋事之可商者有十焉

一曰商兵夫剿賊須兵此必然之理也然兵必核實爲我用否則

乾坤正氣集

卷四覽四

一

紙上空談有兵亦與無兵等今各邊之精銳以屢調盡空卽欲照  
部議集兵不可得矣如使可得皇上但據督臣所奏兵數一細按  
之似督臣之所以應大剿者竟未有加於前也且榆鎮以聞警淹  
畱寧鎮以被軼歸息皆不能卽至夫兵力如故迅掃何期又況可  
變不獨在無兵乎此其可商者一也 一曰商餉夫未籌兵先籌  
餉士馬所以貴飽騰也然必餉圖可繼餉始不窘今海內之脂膏  
已竭澤欲盡雖欲照部議徵餉未必如數矣卽能如數皇上但據  
督臣所奏餉數一細覈之似兩部之所議以供兵三萬者必不能  
供二萬也且兵合於何日餉足於何期見支猶虞掣肘補欠更需  
時日調兵原期大剿餉將困於坐食又況可憂不獨在餉之難繼  
乎此其可商者二也 一曰商地夫用兵全在地利地利者我之  
所利而賊之所不利也向來賊勢張則四出困則歸秦賊之地利

在秦明矣乃我又若惟恐賊之不得地利始則合督理之力而驅之於秦繼則儘一督之力而守之於秦環秦皆山也賊既據山爲巢兵又視山若阱賊自安閒於山內兵殆坐困於山外賊掠糧而兵不能斷賊之糧道兵屯日久所需米豆日益騰貴至不能支是逼賊於山不能窘賊反以自窘此剿賊之大病也樞臣四面六隅之議毋亦欲我殺賊有地賊逃生無地耳若竟如此賊將踞全秦爲窟穴而四面六隅幾爲空張之網矣此其可商者三也 一曰商時滅賊須審天時天時者我當其時則可勝賊當其時則可圖也賊夏秋則橫冬春稍戢賊之時不在冬春明矣乃我若偏憐賊之窘於冬春而不肯乘機者無兵每嘆於冬初兵集已至於春杪屢值冬春我旣無兵乘賊賊更乘我無兵不戰而賊愈鴟張強戰而兵或敗或餒是賊益肆而我愈無如賊何兵無能爲而賊所垂

乾坤正氣集

卷四十九

二

涎之城堡日任其攻劫竟付之不能問矣夫有圖賊之時我旣錯過賊反狂逞此剿賊之大患也部臣計餉一年毋亦謂我之殺賊在此一年而賊之滅亡在此一年耳若竟如此雖再易年亦無望獲醜執訊而年復一年竟成不了之局矣此其可商者四也 一曰商賊剿賊必須知賊而後賊可圖也賊動稱十萬動稱數十萬而老本精賊畢竟無幾今豫楚江北雖皆報有多賊乃賊之強者悉在秦然秦賊自闔王被擒蠍子塊張妙手就撫惟過天星闔將混天星三賊略稱悍肆而三股精賊亦自寥寥無多也今我如畢智竭力日夜惟三賊是圖第能於三賊了當一二股而秦賊便成破竹秦賊平而豫楚江北之賊便可傳檄定矣如不握定要領早從大頭顱處下手而泛泛從事賊必不可滅也夫賊雖無他志然原非善類未有竟不滅而竟無他志者臣不能不深憂其卒也此

其可商者五也 一曰商我圖賊宜先知我我之滅賊非更有可待也地方破殘凡幾人已殺戮凡幾猶可徐俟修復乃上下人心渙散點卒窮民到處思歸是吾之可憂者不獨在賊蓋自廿載供邊十年備寇以來已悉索做賦矣茲復議餉二百八十萬兵十二萬措辦之難爲何如此若兵餉豈可輕於一擲卽當如臥薪嘗膽痛念此番兵餉非易使此番之兵餉不又似從前之虛擲而我之力尙可少舒我力舒而後來再有征繕猶可勉強供應也如不深維根本而悠悠如故後來之事益難矣夫我之元氣久索尙爾尅削不已寧有不危者乎臣又不忍深思其卒也此其可商者六也 一曰商剿覷定一股剿完一股此剿賊之要訣也今計不出此迎擊旣畏賊鋒合圍又苦兵弱遂不得不殺零截尾以掩飾目前而剿不成剿矣不思賊卽衆強自可設計以圖之蓋賊無城郭自

乾坤正氣集

卷四言九志

三

固原日日寄命於我驅之於必困之途取之於垂死之日王師所以有征無戰也如第一彼一此爭勝負於矢石之間卽勝亦無關於蕩平況未必勝乎專剿之責在督理而臣亦撫臣止可協心參贊必不能隨賊遠逐也此其可商者七也 一曰商撫懷之以德懾之以威此撫賊之要著也向之歸命未必假我旣有誘殺之嫌今之投戈未必眞我已無堅拒之力遂不得不遷就籠絡而撫不成撫矣不思賊卽眞誠無他我亦須張威以待蓋賊已窮極思返我惟有以懾服之則狐疑狙伺失其故智又乘其欲盡之勢迫以難犯之鋒乃可永消反側也如己恩窮威頓始望懷來於狡詐之輩卽來亦難保其有終況必不來乎第行撫專責之各撫臣而督理惟宜一意剿殺庶不啟賊以輕視也此其可商者八也 一曰商將制勝之機在於擇將總鎮偏裨皆剿賊之將也乃能實實剿

賊者幾人卽左光先曹變蛟二帥一則頗能詳慎一則頗能勇往  
然久歷行間究未能獨奏膚功而此外之庸碌者尙多也臣謂曹  
左暫堪驅策其餘亟宜裁汰失律者亟宜按以軍法以警衰惰卽  
如臨洮總兵孫顯祖年暮無功斷難姑容則凡如顯祖者均宜次  
第甄別此事之可商者九也 一曰商人戡亂之任在於得人督  
理巡撫皆辦寇之人也乃能實實辦寇者幾人惟督理二人一則  
勞著征流自可券諸已往一則功成靖遠尤可信其將來其餘尸  
位應不乏人也臣謂督理併膺倚任其有不能辦寇者似宜亟行  
更易如臣傳庭心徒切而命實乖今且貽累督臣一事無成卽或  
憐非禍始亦宜重加罪斥則凡似臣者皆不敢貪戀勝臣者亦不  
敢推諉矣此事之可商者十也以上十事伏祈穆然深思毅然獨  
斷於一切事情宜廟堂裁決者卽行裁決宜該部申飭者卽行申  
飭於文武諸臣宜照舊畱用者仍行畱用宜覈議斥處者卽行斥  
處懲前毖後改故圖新封疆之事或有瘳乎臣身在局中實見情  
形如此用敢備疏請裁期於在事諸臣力圖共濟非徒以條議塞  
責伏祈聖明全覽施行崇禎十年七月二十日具題八月二十七  
日奉旨該部看議具奏

報甘兵抵鳳併請責成疏

題爲恭報甘兵抵鳳臣遵旨調度併請防擊一定之責成以便遵  
守事崇禎十年六月初一日準兵部咨爲塘報成階剿賊級功等  
事該本部覆題奉旨是這川兵應量撤量畱着該督撫會商妥確  
速奏西鳳畱王國靖兵專聽撫臣調度及川兵同日分別賞擢等  
事宜俱依議標旅屯軍併著該撫上緊募練務濟緩急不得遲延  
欽此欽遵抄出到部移咨前來隨經移咨督臣洪承疇會議去後

除川兵撤發回蜀已經督臣另疏具題外其甘兵奉旨給臣調度臣一面移咨督臣督發仍一面屢次移文王國靖催調今於七月十五日準督臣咨稱原任總兵王國靖統領甘肅官兵二千八百餘員名馬騾一千八百餘匹頭於五月二十五日自禮縣離營回鎮將選留實在官兵二千七十九員名馬一千三百二十八匹騾五十四頭俱交付甘肅原任副將盛略統領於七月初八日自秦州啟行前赴鳳翔西安聽貴院調度其官兵應支廩糧馬騾料草自六月二十日以前俱於本部院軍前餉銀動給自六月二十一日起至七月初十日止其該廩糧料草銀四千五百八十八兩七錢六分已行布政司於收貯八九兩年新裁公費銀內支給其自七月十一日起應支廩糧料草則例總統副將一員盛略日支銀五錢見任甘肅遊擊一員趙用彬日支銀三錢甘肅總兵標下坐

乾坤正氣集

卷四百九十四

五

營都司一員葛勇日支銀二錢五分甘肅總兵標下旗鼓守備一員鄧萬鍾日支銀一錢八分加銜遊擊見任大平堡守備一員王萬策日支銀二錢五分加銜守備楊奎光等三員每員日支銀一錢六分千總曹撒賴等二十一員每員日支銀一錢四分把總孫登魁等四十員每員日支銀一錢材官紅旗張六等一百一十一員名每員名日支銀八分百總管隊大旗陳能等一百一十名每名日支銀七分軍丁一千七百八十九名每名日支銀六分馬一千三百二十八匹每匹日支料草銀五分騾五十四頭每頭日支料草銀五分以後聽貴院給發等因到臣該臣看得甘肅之兵奉旨屬臣調度臣催取再四今始東來適寶雞屢報賊警臣卽檄令屯駐鳳翔剿禦此兵共計二千七十九員名并馬騾月費餉七千二百餘兩計一年卽該費銀八萬七千餘兩臣不得不照督臣原

支則例按月支給督臣通計剿兵猶欲將甘鎮續調之兵併以予臣第督臣會移臣手書謂甘兵非賊敵手臣查此兵隨征半載功級寥寥塘報可稽臣受防剿一面之寄安能全領非賊敵手之兵以圖僥倖於萬一查有部調鎮臣于威親統延兵南下威以宿將臨戎威聲紀律自與徧裨不同乞救賜臣將威兵畱之西鳳佐臣防擊又可兼顧本鎮其甘鎮見到各兵內其中有應汰者臣清屯事竣刻下卽親詣鳳翔逐名選驗分別去畱約或可得千餘名臣聞延鎮整棚待調之旅亦僅千餘以此二兵合臣見在標兵併各防兵與臣所遣官市募者陸續齊集共可得馬步戰兵六千餘名臣必能於分防協擊勉圖報効臣於此竊有請焉朝廷馭邊臣之法必責成分明然後賞罰畫一臣職任鎮撫奉皇上分防協擊之命東西皆當兼顧勢不容鶩東而遺西鶩西而遺東理臣剿賊於

東者也如理臣追賊近陝臣卽應分防協擊於潼關督臣剿賊於西者也如督臣追賊過隴臣卽應分防協擊於鳳翔儻東西防擊各無隕越則臣可幸叨不譴如東西防擊或有不效則皇上治臣之罪以爲督撫戒臣甘心焉此外不特潼關之東臣不能越境東出卽秦隴之西業有督臣大兵臣亦不能舍卻根本與督臣盡聚西偏如今歲春夏間督臣提五鎮之兵剿賊於隴右臣居守省發西鳳郡邑幸得晏然卽有零騎窺逞臣檄偏師一擊賊卽踉蹌西遁數月以來臣雖苦無兵實未悞事邇奉嚴旨與督臣一併嚴處恩威出自朝廷臣子豈敢節避然犬馬微忱亦欲仰邀天鑒埃有處分部咨另疏剖陳外臣思地方之責成若不明明則廟堂之賞罰何以畫一伏祈敕部覆議分別責成除漢興商雒臣已前疏籲請復設卽撫專轄外自今以往如令臣遵奉屢旨於潼關西鳳之

間調度兼應卽以調度之效不效定臣之功罪惟命抑或念督臣久勞行間宜令督臣彈壓於潼關西鳳之間使臣提分防協擊之孤旅隨賊專剿臣亦不敢不惟命總期於責成分明賞罰畫一臣非敢擇便非敢避難惟有竭智畢能以求仰分聖憂於萬一而已若似今者督臣提五鎮之兵剿賊於西臣在省防守近省千里內毫未有失一旦併干聖怒使臣惶惑無措則此後臣將何以自免也統祈聖明鑒裁施行崇禎十年七月二十六日具題八月二十七日奉旨該撫親統甘兵協剿已有旨了這延兵畱鳳事宜及分別責成以定功罪該部看議速奏

糾叅婪贓刑官疏

題爲刑官委署婪贓遵敕先行掣問事臣惟剿寇必先安民而安民尤在察吏臣備員秦撫每於詰戎討寇之餘晷益厯察吏安民竈坤正氣集卷四百九志

七

之本圖故屢飭所屬郡邑凡問埋詞訟不許濫贖加罰徵收錢糧不許勒收羨耗日用買辦不許虧累行戶榜示諭禁再三嚴切尤於署篆各官諄諄加意詎有貪贖恣肆如署涇陽縣事慶陽府推官何守謙其人者涇陽一邑爲三秦富庶之區前任知縣王瑄先經臣備察論劾臣慎重此缺不敢輕率擬補而西安丞倅寥寥無可委署藩司因議借才鄰郡以守謙調委臣據詳批允謂本官必知刻勵自愛或不至染指羶地臣以邇來吏治日汙秦中尤甚恐徵收索羨錮弊難除密諭守巡兩道單騎親往掣櫃拆驗隨據分守關內道李虞夔揭報親至涇陽抽驗各里收完在櫃糧銀每櫃抽驗二封每兩除正數外有加收羨耗三四分有五六分者有原收數少者卻於流水簿并封袋捏寫數多者其餘在櫃銀兩尙未盡拆等因又據稱稟自本月初七日以前收者何推官拆訖無可

考惟自初八日以後者貯櫃無幾抽掣數封秤兌每兩正數之外餘者多寡不一至少不下三分至多不過六分另單呈覽中有一櫃係收書作弊簿封與銀數不符現發糧廳究擬另報臣又訪得本官婪肆多端復將單款事跡並被害證佐姓名開發該道就近秉公親審明確呈報一面令該道先將收完在櫃糧銀公同攷官逐封秤兌通完總算原該正數若干外加羨耗若干并將收糧原數及拆驗之數嚴追封解去後隨據該道呈報該本道公同西安府通判余昌稜該縣攷官李連芳等親詣該縣堂將前抽驗銀封驗明本道原判殊封即追原收銀數三把將各里銀櫃共十一個逐一拆驗秤兌正數銀二百八十九兩五分一厘八毫外加羨耗銀一十四兩五錢二分總計每兩外加耗銀五分屢經申飭之後尙有此數就此計算本官任內共收銀二萬三千七百四十

二兩二錢零其外加羨餘銀一千一百八十七兩一錢一分其前收過銀兩已經起解恐所加之數尙不止此今將收銀吏趙叅張光顯田國璽原收銀數三把固封呈解拆驗之數係民間私戲恐于天平不合請乞本院查審將三戲發布政司較合等因臣面審趙叅供稱何推官原定戲子每兩比民間重三分秤時又高擡六七分大約每兩重一錢先因百谷里花戶成光德納銀六錢八分拆銀輕少責二十板枷號二日身死是實又據張光顯供稱何推官平素火耗原有加一今回慶陽因本院告示嚴禁令戶房吏分付上糧花戶從今秤平些是實又據田國璽供稱何推官自枷死花戶成光德後因火耗輕少又擎三櫃四櫃九櫃十櫃十一櫃花戶羅安等約十餘人各責二十板十五板不等將十一櫃九櫃十櫃各問有力杖罪六分自此以後花戶俱加火耗每兩以民間戲

子在加一以外以降發法馬每兩約加六七分又封銀不論多少俱要成錠因此百姓所費遂多又供秤銀若是平了何推官便說就是買賣也沒有這樣平秤之理等情各供明白及將解到原戩與布政司法馬較兌所差無幾恐此戩猶非收糧原戩并將各吏所供火耗輕少拘拏花戶枷責斃命及納銀無論多寡俱要傾銷成錠情節併行該道與原發單欵一併審明確報去後今據該道將臣原發單欵計十四欵逐一審明登答呈報前來併粘連已故知縣王光翰妻曹氏武生樊聖謨當舖行王周斗行張萬庫告狀四紙同審明犯証申解到司臣復行親審無異該臣看得秦吏至今日固稱數摘之瓜而秦民至今日更無可剋之肉連歲均輸助餉派徧九州皇上獨俯聽臣言特免陝西者誠以十載兵荒之殘黎實有旦夕難保之勢不得不少畱一息以養將來回蘇之脉如

聽不肖有司腹削吞噬而莫之問則皇上破格所免與微臣痛哭所請者不且毫無及於小民而止飽此輩之囊橐耶慶陽府推官何守謙司理既有察吏之權握篆更受保民之寄乃不問潔己惟知谿壑是盈且加以殘民豈但簠簋不飭憑奸僧爲線索賄賂潛通視民命如草菅枷責立斃尤可異者以縣令之妻忠將之母焚焚霜發望八垂死而本官無端彬指慘目傷心又何有於武生樊聖謨之橫加責罰也本官酷以濟貪斷難逃於三尺除遵奉敕諭一面先行拏問外謹將審實事欵備列糾參其慶陽推官員缺敕下吏部速選嚴限到任臣謹會同按臣謝秉謙合詞具題崇禎十年七月二十六日具題八月二十七日奉旨何守謙卽盡法追擬具奏員缺速補該部知道

題爲恭報官兵兩戰聯捷事據分守關西道李公門塘報大天王合陵鴈等賊塘馬逼犯寶雞地方請兵援剿適甘兵奉調東來已至岐山臣隨飛檄副將盛畧速返鳳翔偵賊剿殺臣亦卽親提標兵前往調度乃以天雨連綿至八月初二日臣統兵西發本日據副將盛畧塘報七月二十四日官兵至寶雞渭河迤南八廟天王村伐峪與賊大天王賽闖王等對敵斬獲首級九十八顆等因到臣臣復諭令該將乘勝鼓勵務期盡殲賊衆旋聞賊被創之後猶屯渭河南伐峪八廟等處臣思賊在河南宜從盩厔進兵且賊方隄防河北正可掩其無備首尾夾擊一鼓剪滅臣隨提標下馬步官兵一千八百餘員名介馬星馳又檄監紀同知張京督內丁二百名併咸陽駐防參將尤捷都司賀英守備馬虎官兵七百一十六員名悉赴盩厔協剿至初三日俱抵盩厔臣隨發隨征守備薛

乾坤正氣集

卷四百九十四

十

見龍從盩厔渡河與副將盛畧約期夾攻去後至初五日卯時臣督兵行至郿縣聞盛畧已於初四日殺賊獲功隨據該將報稱八月初四日官兵至賈家村與賊鏖戰斬獲首級二百三顆等因到臣又節據分守關西道副使李公門塘報相同該臣看得大天王等賊從徵秦東犯逼近寶雞督臣洪承疇大兵方扼闖過等賊於階成臣檄甘兵剿擊一戰得捷臣復悉索標下馬步從盩厔而西迎賊之前期會甘將以圖夾擊乃師方次郿而甘兵再戰復捷之報已至賊兩創之後竄伏山峪似欲西奔臣馳渡鳳翔調度官兵兩路搜討儻奔軼不遠更無別股賊黨爲之聲援則此賊必落毅中矣甘兵久在隴右未立功績一入鳳而兩戰兩捷雖賊僅數千亦以新來之氣可鼓耳副將盛畧都司葛勇並應敘錄而葛勇斬臨陣退縮一卒遂使軍氣大振功尤足多隨征參將趙用彬加銜

遊擊王萬策旗鼓守備鄧萬鐘加銜守備楊奎光中軍祁功偉千  
總盛允昌等均應稟敘獲功軍丁臣卽照例賞給用示鼓勵臣繕  
疏將發九月初九日晚據都司葛勇差塘丁口報本日早該將選  
臣屢檄期約標兵從潁川一帶偵探大天王等賊會剿間忽見南  
山有馬賊無數執打大旗絡繹出峪循渭河南岸東走有賊營走  
出一人因販椒被擄乘空逃出稱出峪之賊係闖將過天星混天  
星賽闖王四隊六隊八隊小紅郎等十數大股合力東來賊自寅  
至酉尙未走盡東西寬約四十餘里聲勢甚猛次日酉時又據守  
備薛見龍報稱徽秦東來大賊於初九日三鼓從東石家嘴探河  
口看賊之向往從東路行又於初十日寅時從益門鎮出來之賊  
俱往東行兩日尙未走盡等情臣於數日前卽聞督臣督左曹兩  
帥大兵駐劄禮縣賊日近縣城索戰若大兵不勝賊必倒東直犯

乾坤正氣集

卷四十九

十一

涇三內地今賊果東矣大兵消息尙未知何如臣維闖過等賊與  
大兵相持於階成山中者七八月氣焰風聲益非昔比各賊固多  
有借之以爲名者此東來出峪之賊亦未必卽係闖過然據報兩  
日之間自寅至酉尙未走盡其衆可知憶去冬今春賊盡聚西鳳  
卽闖過等賊其衆亦未至此當其從咸陽東窺涇三闖過糾諸股  
之賊合力狂逞臣提寥寥標旅猶能扼之使西使此賊卽闖過也  
則是賊勢未嘗少減而猶少增使此賊非闖過也則闖過之勢又  
不知若何而賊衆之猖獗愈不可言矣且聞西禮之賊尙有未盡  
東者如此賊之來竟無剿兵尾其後督臣止分臣甘兵二千晉蜀  
之餉尙未解到分文臣新增之兵雖竭蹶募練焉能一蹴就緒乃  
欲以獨力支此猖獗之寇豈易易也且初八九等日節據潼關道  
稟混十萬老獍等賊已至陝州塘馬撤至閩鄉有河南王都院

陸兵道督兵追剿勢必入秦儻東西之賊合謀並犯更可寒心除臣馳檄西鳳州縣固守城池併行潼關道督關門及韓邠防兵贊畫司務廳陳繼泰督鄉兵馳赴堵禦外臣惟有酌量緩急往來調度謹先馳報上聞伏乞垂鑒崇禎十年八月十一日具題九月二十一日奉旨據報甘兵再捷闖過混十萬等賊東西交逞俱有旨了該撫須嚴加秣勵相賊形勢與督理二臣協力夾剿蚤奏蕩平不得借口弛卸該部知道

降處陳謝併瀝下忱疏

奏爲臣罪蒙恩降處恭陳謝悃併瀝下忱事崇禎十年八月初六日準吏部咨爲馳報平鳳商雜賊情暨聞石漢二邑賊寇入城事準兵部咨該巡按陝西監察御史謝秉謙題前事等因奉旨據奏賊突涇鎮南窺西屬又商雜紛告軼入石漢不聞疾救玩延流毒

乾坤正氣集

卷四百九十五

十一

殊可痛恨該督撫身膺鉅任遵限蕩平何在俱著議處仍一面嚴飭鎮將互援分討窮搜盡殲速底廓清如再僨誤諸將定立賞憲典不宥其興安傳報情形該撫還確查馳奏該部知道欽此欽遵移咨到臣該本部覆題看得流賊橫軼漢中時日不爲不久攻剋石泉因而圍困漢陰民命旦夕正宜調發兵將救焚拯溺迺督臣洪承疇撫臣孫傳庭二臣均膺討賊之任坐視城陷置赤子於淪亡若將誰諉相應各降二級照舊戴罪剿賊自贖等因奉旨洪承疇孫傳庭著各降二級照舊戴罪剿賊自贖欽此欽遵抄出到部移咨到臣臣不勝感激不勝惶悚除恭設香案望闕叩頭謝恩外臣竊惟秦事當壞亂之極實微臣受事之初臣自銜命入關所見所聞皆堪浩歎臣已自分有必得之罪然私意挽回補救雖非臣力所及而頂踵捐糜臣所素矢逾歲以來率一旅標師東援西擊

恨不立奏蕩平其僥倖所成往往出於臣力之外臣不敢老師也  
皇上給臣餉銀六萬兩臣直欲當幾百十萬之用支用纏年猶未  
告匱此外剿餉未嘗分費錙銖臣不敢糜餉也鞏漢所屬雖失事  
屢聞第非在大兵行剿之地卽係撫治分轄之區他如西鳳平慶  
等府幸皆保全竄謚臣不敢貽誤地方也凡此皆皇上所素鑒舉  
朝所共知惟是藍田之變兵叛標下就中委曲臣茹苦難明實臣  
之罪乃蒙皇上矜其乖蹇特賜寬宥自此以外臣竊謂可幸無罪  
矣頃因按臣謝秉謙有馳報平鳳賊情一疏臣奉有議處之旨臣  
皇皇莫知所措續接部咨因賊攻剋石泉圍困漢陰將臣與督臣  
洪承疇併議各降二級戴罪剿賊自贖覆奉諭旨其涇鎮西屬之  
有無失事商雒之會否軼入該部並未議及想已知之悉矣惟是  
石泉漢陰之攻陷俱在大兵入漢之後爾時臣止慮彼中米貴餉

乾坤正氣集

卷四十九

三

絕特促布政司那借餉銀七十兩於標兵數百名內選撥二百名  
徒步分攜從黑水峪解漢接濟至於大兵救沔後奔亡之賊猶能  
攻陷兩邑與夫民命之旦夕咫尺大兵猶待臣迅發將領馳赴此  
豈臣意料之所及也如所云均膺討賊之任臣敢謂非臣之任第  
討賊之所必需有三曰兵也餉也權也委付均則責成亦均臣之  
均與不均不待臣言之喋喋固盡在聖明鑒照中矣況卽委付原  
均而東西遠近必有區別竄臣之敢于坐視乎爲法受過臣所甘  
心故臣初奉嚴旨卽有竄重無輕竄斷無疑之請第該部擬議之  
際權衡微覺未審恐罰臣不足以示後來之警則臣之所重惜也  
若夫不卽褫斥仍許臣剿賊自贖此實皇上鼓勵之洪仁臣雖驚  
劣不敢不竭蹶從事其能這過與否臣莫能自必惟恃聖明在上  
無微不至樸忠鯁念終當仰荷憐管也爲此謹奏崇禎十年八月

初九日具奏九月二十一日奉旨地方功罪督撫均屬一體孫傳庭著同心共濟力圖殲剿毋得諉卸該部知道

奏報賑過饑民并發牛種銀兩數目疏

奏爲遵旨行賑已竣謹會疏奏報事崇禎十年二月初三日準戶部咨該臣題爲秦民窮困已極相率走險可虞懇特沛殊恩奠安危疆事該本部覆題本年正月初十日奉旨覽奏秦省災荒至極民不聊生深惻朕懷亟宜賑恤但目今部庫匱訕茲特發御前銀三萬兩再著太僕寺發銀二萬兩光祿寺發銀一萬兩該部撥給車贏著忠勇營中軍李應忠星夜押解會同該撫按相度緩急設法救濟務令饑民得沾實惠事完報銷如奉行不善及乘機作弊者據實參奏仍查災重之處停征錢糧併飭地方有司實心拊循不得虛行故事欽此欽遵移咨前來臣卽檄行陝西布政司督令

鞏坤正氣集

卷四百九十四

十四

被災州縣確查應賑饑民戶口二月初四日欽使賣銀六萬兩到省暫停布政司聽候分發臣同監臣李應忠按臣謝秉謙仰遵明旨會同商確除慶陽臨洮二府屬州縣兵荒未若西安等府州縣之甚者不遍賑外將西安鳳翔延安平涼興安漢中鞏昌六府一州所屬兵荒州縣逐一詳酌分別應賑量賑先以里甲之多寡州縣之大小擬註銀數及取冊已到復爲裒益其在鞏昌府屬者臣等與甘肅按臣黃希憲一體移會緣流寇擾害道路多梗齎冊發銀勢難齊一有從山峪間道陸續投冊者臣等卽陸續會議銀數一面行布政司分撥解發一面行各該道府委廉幹官員公同監臣分遣把牌併該州縣掌印官分鑿包封逐名點散有臨時不到或別有事故者卽扣銀繳還母容混冒至秦韓兩藩貧宗與衛所牧監窮軍亦皆報冊求賑蓋罹災實與民同往例原皆併賑是以

臣等亦酌議量賑其荒殘最甚州縣貧民無力耕種者仍各酌給牛種令每十人同領銀一十五兩俟其收穫二年後止照原數還官收貯仍備賑貸之用今事已報竣總計賑濟過極次貧宗貧生貧民貧軍共九萬八千一百三十九人共散過賑濟銀五萬六千四百八十四兩三錢共給過牛種銀三千六百五十八兩六錢七分二項共用銀六萬一百四十二兩九錢七分內一百四十二兩九錢七分係秤兌多餘之數臣惟三秦荒盜頻仍哀此下民非死於賊卽死於歲其顛領未盡而僅延視息者蓋已無幾矣不惟含殮非其故卽耕鑿亦鮮其人郡邑集鎮強半邱墟阡陌田園祇餘榛莽一二子遺皆竄伏於土穴山洞之中掘草根剝樹皮以果腹甚至有人相食者各省災祲困苦未有若斯之極仰蒙我皇上特允臣等之請沛發多金遣使遙臨渙綸遠播鳩形鵠面咸戴皇恩

乾坤正氣集

卷四十九

五

山谷水濱盡沾聖澤人心賴以維繫卽天意亦賴以挽回蓋自欽賑旣頒之後西鳳近地遂得風雨無愆來年有穫此實皇上軫恤災黎感格天心之所致也其十年分災重之處如漢中興安與鞏屬數處寇擾最久斗米價至兩餘所有應蠲應緩錢糧已經兩按臣疏請奉旨止酌量蠲緩存畱然漢中興安及鞏昌兵荒最甚之處一切錢糧俱萬難催徵至西安鳳翔平涼所屬之商雒隴扶涇崇等處殘破已極遽難望荒蕪於有秋近按臣謝秉謙復以商雒五屬軍餉賦役全書生員優免三項具題矣其餘應免錢糧并延安旱災雹災俱俟西成之後勘確重輕分數同漢興鞏昌臣等通行酌議題請外今將賑過人數銀數及發過牛種臣謹會同監臣李應忠按臣謝秉謙黃希憲合疏具奏至臣等於欽賑未至之先按臣曾發倉穀分賑臣於山陽鎮安藍田三縣行司府措給過賑

銀共一千兩然爲數涓滴未敢溷列上聞爲此謹奏崇禎十年九月初四日具奏本月二十六日奉旨已有旨了該部知道

報寶卮剿撫捷功疏

題爲恭報大捷事先是大天王等賊從徽秦東掠鳳寶我兵兩戰兩捷斬三百餘級賊敗入顧川山谷臣抵鳳翔仍督標兵與甘兵兩路搜討間又有棧道出峪之賊從寶雞渭河南岸東犯又潼關道報混十萬等賊已近闖鄉勢將西闖關門臣酌量東西緩急調度堵禦情繇已於八月十一日具疏奏聞隨準督臣洪承疇手書謂東犯之賊係小紅狼蠍子塊餘黨及臣詢差官李明謂闖過混諸賊亦俱東犯臣亦卽於十一日移文督臣并按臣謝秉謙會調大兵東來合剿隨據統領甘兵都司葛勇報稱出棧諸賊選精兵渡渭窺探虛實都司率漢土兵丁擒獲活賊一名來山虎縛解到

乾坤正氣集

卷四九七

六

臣臣面審據供出棧之賊係猛虎中斗星關索一練鷹關事王奎木狼黃巢關將等股欲繇蓋鄠渭華一帶徑下河南臣諭來山虎爾賊頭關王等已就戮蠍子塊等已就撫今放爾回去宣布恩威有能改邪歸正者皆待以不死若有好漢準隨營殺賊有功一體給賞如執迷不悟本院督大兵盡行剿滅不直殺爾一人釋放去後十二日午時據原發寶雞探賊塘撥守備薛見龍報稱本日寅時賊到高店蔡家坡放火等因據此臣見賊漸東犯於過省南則鄠藍臨渭一帶震驚如渡渭北則興咸涇三等處可憂因一面檄行監紀同知張京督同參將尤捷等統延兵於寶雞堵扼賊後臣提標廿二兵從岐扶渡蓋屋馳抄賊前迎剿以蓋屋地稍平行便於衝擊本日酉時師次岐山當夜有中斗星領步賊哨頭草上飛的名楊威來投票稱來山虎蒙本院不殺放歸故小的捨妻子來

降又供各賊欲東犯河南等情十三日臣行次扶風據鳳翔府通判陳元勛推官張鳳鳴差役押被擄難民杜孝齋猛虎等八頭目乞撫稟帖到臣臣一面給示開諭一面鼓勵兵將赴武功渡河衝殺十四日臣至武功報賊復西退二三十里十五日臣復移咨督臣催發剿兵從鳳寶東下與臣東西夾擊至十六日又據原發郿縣探賊塘撥守備薛見龍報稱從賊營投來頭目番山鷄等一十四名并帶男婦六十四名口馬騾驢八十四頭查番山鷄係前賊闖王舅子臣審明收撫隨差千總張世強前去猛虎等營招諭十七日張世強回稱行至河上與賊宣布招撫德意見各賊雖口稱願降仍行搶劫似有潛往東行消息等情是日又據潼關道報稱混十萬等賊仍在閩鄉一帶屯劄等因十八日寅時又據塘撥守備薛見龍報稱賊在高店等處圍攻堡寨甚急等因臣自至武功

乾坤正氣集

卷四頁九十四

七

功大雨三日是日少晴臣卽提兵渡蓋屋進剿途中又據監紀同知張京報稱大天王等賊從楊家河出口捉住鄉民盤問猛虎等賊今在何處要去合營卑職卽於十七日發內丁并延兵前去衝殺斬獲首級一十五顆生擒二名日晡賊始逃奔上山等因臣於十九日五鼓提兵從蓋屋馳至郿縣東三十里槐芽鎮遇賊我兵奮勇衝殺賊敗西返日暮收兵次早臣至郿縣據分巡關內監軍道僉事王文清塘報斬獲強壯賊首四顆生擒一名射死無數收獲強賊九名等因臣慮賊仍東潰一面檄潼關道丁啟睿併標下贊畫司務陳繼泰從藍田一帶差塘撥遠探如賊潰敗或賊有從東路奔逃者該道卽督關門防兵該廳卽督民屯等兵設伏堵賊一面督官兵於二十一日進攻賊據阻不出二十二日賊頭關案一練鷹復具稟令難民張義投臣乞撫臣仍給告示差鄉導趙士

學等往諭并偵賊頭住址及賊中虛實二十三日賊復遣書寫岑彭等二名齎稟赴城投見臣察彭願撫最眞授計於彭使搆賊相圖去後二十四日賊遣精兵近縣窺探臣發馬兵數隊馳殺陣斬二級活擒馬賊三名審明梟斬是夜岑彭約同賊精兵數十人潛驅馬騾出營來投臣卽於二十五日發兵分四路進剿賊憑高瞭見先發老營入峪畱精兵賊倚山待敵我兵馬步並進奮勇仰攻鎗砲齊發賊不能支敗退上山我兵奪嶺大戰獲捷據監軍道王文清塘報共斬強壯馬賊五十二顆生擒一十三名塘報間又據降丁番山鷓赴本院稟稱鷓先年隨闖賊時曾在扶風醴泉地方埋銀二處醴泉埋銀處所記識不眞扶風城下埋銀處所至今猶能記憶乞行差人押赴該縣掘取等情蒙本院差官郭鳴鳳李國艾押同鷓并行令扶風縣印官同赴原埋銀處所眼同鷓等掘取

乾坤正氣集

卷四十九

七

去後本月二十七日隨據該縣申稱卑職同差官及降丁街民掘出銀四大錠二百兩碎銀六百九十三兩共銀八百九十三兩同衆秤兌包封解赴軍前等因蒙本院驗明給賞番山鷓等各降丁銀一百兩餘銀發監收廳貯庫充餉訖等因復探賊自殺敗狼狽已極循山西遁臣又星夜移文督按二臣會催剿兵從西面堵擊使賊進退無路至二十八日二鼓有臣先後差役李玘均等同督臣差役齎督臣回文到臣臣閱督臣密字謂親提左曹等兵於二十八日早至寶鷄據報猛虎中斗星大天王三賊合營俱屯聚寶鷄以東楊家店本日辰刻具函會兵間傳聞賊已向西行走未知何如賊情變幻時刻不定若果向西逼近寶鷄二三十里官兵勢又不容等待延遲不速剿以致失此機會希卽傳齊官兵先量發馬步各兵若干執火器速赴斜峪山口鳴砲扼堵再督大兵從東

往西擊殺若左曹等兵一殺則各賊勢必東竄正所謂東西夾剿  
可必成功如或今二十八日午未時以後賊苗頭未盡向西來未  
甚迫近寶鷄則此中官兵必先動必以今夜二更發兵二十九  
日黎明到賊處剿殺本院官兵亦卽於今晚定更時發行次日黎  
明到賊所東西夾剿等因臣當卽傳齊各將掌號發兵西馳合  
剿去後據監軍道王文清塘報到臣又據監紀同知張京報稱二  
十九日進剿各營共斬賊級八百餘顆生擒一百餘名又招投降  
上天虎等賊五百名內精賊一百五十六名俱到鳳翔關廂住宿  
等因又據總兵左光先曹變蛟奎人口報相同除左光先曹變蛟  
等營斬獲功級聽督臣具題外九月初一日又據潼關道塘報八  
月二十五日探得豫中之賊老營仍在地名中原西畱東畱魯山  
等村屯劄塘馬到秦村傷人八口復至永泉鎮離閩鄉止二十里  
乾坤正氣集

卷四十九

九

等因到臣該臣看得臣之振旅而出也爲大天王一股也其衆僅  
數千臣擬調度標甘三兵夾擊盡殲乃臣提標兵方出甘兵已遵  
臣先檄兩戰獲捷斬首三百有奇故臣抵郟而賊已西臣遂渡渭  
入鳳欲另畫攻圍之計以盡賊而忽報大賊出棧蓋卽猛虎中斗  
星等賊也各賊哨目頗多猛虎則代蠟子塊中斗星則代闖王統  
其黨衆以稱老掌盤子者也賊出棧卽遣賊撥渡河直瞰寶鷄甘  
營都司葛勇率親丁生擒其領撥之來山虎解臣訊之知賊欲繇  
藍鄠歷渭華涇犯河南臣釋之使復還賊營宣布朝廷恩威以開  
其來歸之路而攜其死戰之心臣一面提師東旋從武功渡河於  
藍屋川中迎擊比來山虎去而草上飛隨投未幾賊目番山鷄亦  
以來山虎之言率其精兵併男女六十餘人繼至番山鷄乃與仔  
賊闖王相伯仲而人以驍雄敢戰聞者也當小紅郎投降之後衆

議欲以山鶴統其衆因闖將總掌各賊之盤惡其勇力儕已乃以中斗星統之此賊歸而中斗星之衆皆不能自保矣賊復具稟求撫臣亦佯應之而惟決計以圖蓋屋迎擊之舉及臣武功阻雨三日賊猶逡巡寶郿之間又報攻尅堡寨臣恐秋禾遍野賊或據險久屯臣遂於十八日渡河十九日從盩厔郿忽遇賊於槐芽鎮賊之塘馬與我之塘馬方見而賊之老營卽隨其後官兵奮力撲賊賊護老營各輪死鬪苦戰半日僅斬賊數級賊老營漸登山賊乃引去官兵亦以日暮收營是夜臣與監軍道王文清領率官兵露宿本鎮臣復懸賞遣奇兵姚敬邢公夜入賊營借撫行間而賊曰孟絕海又率其妻孥隨姚敬等來投絕海乃蠍子塊營中之錚錚出色者當張鎮被陷時賊得其蟒甲三領蠍子塊與存孝及絕海各分其一今絕海猶披之其勇力可知此賊歸而猛虎之衆亦莫

乾坤正氣集

卷四 兗西

三

不相顧震悚次日報賊西折臣督官兵至郿偵剿而賊屯郿之南山下西踞五丈原東接洪河南倚斜峪關各山口北則石河稻畦圍遶其前臣於二十一日發兵誘戰賊恃險不出我兵空返臣復諮度地形密籌用間用奇之著使鄉導趙士學往復賊所盡得賊中情形及賊首居停之處二十三日晚賊復遣其書寫岑彭等叩臣乞撫而岑彭盡輸賊情於臣願爲臣用臣密授彭意彭唯唯而去次日賊遣精騎近城窺探臣發馬兵數隊縛斬五人甲馬併獲是夜彭遂率其同謀歸正之唐守玘等驅賊馬騾偕來而賊頭關索之戰馬在焉彭至言賊甚窘畏各頭目共議出山而羣賊懼險不從臣於是日晚分派標甘等兵於二十五日之五鼓四路並進賊方日夜懼臣進剿每至夜半卽發老營入山精賊騎馬待戰兵方出郿賊已偵覺狡伏兩翼從中迎敵勝則肆彼長驅敗則誘我

入伏不意臣兵分路而往埋伏之賊計無所施只得分頭接戰官兵奮勇披殺立斬其哨隊精銳數十級敗遁上山我兵亦乘勝攻山追歷數嶺賊之滾崖落澗者紛紛無數慮馬驟悉爲我得自行砍傷與推入崖澗者無算我兵爭欲乘勝窮追而山徑益險不可踰不得不收兵回營賊自是東犯之謀寢而西折之形見乘夜起發老營循山而徙營於寶鷄之南山精賊我搭窩舖狙伏山頭以防臣蹶其後時尙捷之兵雖駐防寶鷄而爲數不多不能出奇制勝臣屢咨督臣請兵夾擊督臣慎密東來禁絕行旅卽臣請兵之差役亦慮其漏洩不肯先發於二十七日之夜至寶鷄次日近午裁書約臣於二十九日黎明夾剿賊距郿遠而寶近故督臣期臣兵於定更時發左曹等兵於二鼓發乃差使不能飛馳書至時已二鼓臣得之固知臣卽發兵已遲然喜賊之必可大創也不覺從

楊中躍起蓋竭賊之力止防東邊若西邊則不惟不及防且不及知出其不意大捷必矣急傳各將掌號啟行諭以卽不能依期馳至賊所但能扼賊東奔之路併嚴防諸峪使賊毋軼出俾左曹得以趕盡殺絕亦卽各將之功比兵行則已三更矣途中復有石河稻田各兵將纒歷崎嶇復行沮洳心徒急而不能前也辰時至釣魚臺則見賊已登山左曹大兵已擒斬近千收兵劄營甘營都司葛勇憤無賊可殺見山頭有賊堅欲攻山匹馬先登樵徑狹仄馬實難行徒步往從者數人而已勇之土丁擠擁山下方尋路急進而勇已中林莽伏賊之矢落馬殞生各丁痛恨搜林斬獲六級負勇回營各兵收劄山下總兵曹變蛟聞各兵至亦領兵四隊至山前與盛畧等相見而返畧等本日統兵回郿是夜賊從山內奔竄次日發塘出哨並無一賊復差步撥乘夜入峪哨探行百里外無

所見憶此賊初出益門鎮時氣焰風聲不可嚮邇旁觀者皆以眾寡不敵爲臣危之卽督臣寓書於臣亦言此賊如竄大天王合則甘肅等兵迎敵宜慎臣擒獲來山虎訊賊之情言將犯省會闖關門東去中州臣爲髮豎毗裂陳師鞠旅迎頭苦戰臣每曉諭各兵將以迎頭之與截尾苦戰之與掩襲其難易懸絕人所共知然蕩平之功必應從迎頭苦戰做起則各兵將之有志功名者亦必應從迎頭苦戰做起各將兵但能迎頭苦戰卽斬馘無多亦必從優敘錄故各將鼓銳諸兵奮勇槐芽鎮之役力竭潰決使不得東下臣復於就中用間設奇頗費籌畫幸賴皇上威靈屢發皆中賊之戰馬歸我營廐賊之積金歸我帑藏賊之心腹爪牙歸我部曲且各兵將殲銳逐北不避險阻使賊膽落西折逼賊之老營於西牽賊之精兵於東以成左曹數月來未有之大捷遠則河南之郡邑

乾坤正氣集

卷四四九十四

三

無虞近則蓋鄂華渭之禾稼可保目前滿篝滿車轉盼卽千倉萬箱諸將之功不可沒也使賊從哈徑狼狽西出督臣復發偏師適往扼擊於徽鳳要險之處此賊其無噍類矣臣已移咨督臣謂當以左曹大兵仍偵闖過各賊所在馳赴圖剿而以臨洮總兵孫顯祖及副將賈人龍之兵待此賊于徽鳳之間掩擊度督臣必有定畫臣因西賊旣敗遁而豫賊之在閩靈者猶耽耽西窺未已督臣大兵見在鳳翔郿縣斗城兵難久駐遂令監軍道王文清督甘兵駐蓋屋留標兵駐鄠縣臣暫回省彈壓兼料理關門之防如此賊仍出峪東窺臣仍介馬星馳赴蓋屋調度一日可至所有迎頭苦戰屢捷之諸將如甘營統兵副將盛畧遊擊趙用彬旗鼓守備鄧萬鍾加銜遊擊王萬策加銜守備楊奎光崔朝印王宗義中軍祁功偉千總盛允昌盛允祥葛衛國卜言兎張士英標下統兵調征

參將王永祥隨征原任參將解文英統兵後左營實授都司翁書  
李國政郝光顯實授守備張文耀調征守備李遇春王世惠督陣  
守備千把總郭鳴鳳王加福魯自友知事錢士芳參謀武清周中  
軍千把總實授守備党威楊豹李文奎監軍道中軍鍾鳴豐俱應  
從優議敘內李國政剿賊最久上歲十二月華渭潼閩勦混十萬  
等屢著捷功今歲正月以孤兵入山解商維之危剿撫皆有成效  
此番聯絡將士督陣衝鋒又居中策應得本官之力最多臣標下  
別無大將獨恃有本官宜量加遊擊銜以示鼓勵至陣亡都司葛  
勇臨敵身先士卒且晁晡之戰手刃退縮之大旗軍丁馬尙德而  
諸兵奮戰獲捷又親縛賊撥之來山虎臣特破格旌賞勇益銳意  
當先遂欲攻大帥不攻之山躍馬囓巖隕命鋒鏑殊爲可惜除臣  
賞棺收殮親行致祭仍應題請優卹以慰忠魂伏乞聖鑒施行爲  
乾坤正氣集

卷四十五

三

此具本謹題崇禎十年九月初四日具題本月二十六日奉旨據  
報卹實合捷具見督撫同心調度將士戮力行間著乘勝極力夾  
剿淨此賊氛母氣盈弛懈復縱他逸兵部馬上馳諭其有功陣亡  
兵弁著察議具奏

恭報司務廳練兵併請關防馬匹疏

爲題請關防馬匹事準兵部咨遵奉明旨行據標下贊畫司務陳  
繼泰呈詳到臣該臣看得用兵莫善於土著莫不善於遠調臣童  
而知之自入秦疆疚心寇患而兵單餉匱無力驅除恨不做古人  
寓兵於農之意以握根本之圖而收蕩平之效惟是邇來之寇狂  
逞多年精強慣戰實不易與每思標本兼舉之計方議募調邊兵  
以資目前之摧陷而又清練屯兵徐圖自強臣實非敢薄土著而  
質買遠求也臣查司務陳繼泰請纓一疏不禁稱快繼準部咨以

繼泰充臣標下贊畫俾其募練土著三千隨臣征剿臣既幸於無  
兵之日得兵又幸臣所有志而未逮者可於本官見之施行準部  
議云西安州縣募有自守之兵一縣三四百名歲費銀六七千兩  
故臣於本官未至之先行司議將近省州縣民兵輸取二千名卽  
以原有工食充餉各州縣工食每兵每田有三分四分五分之不  
等臣令一遵部議悉準五分聽本官至日選練支給如所取民兵  
不能如本官之意卽聽其汰回令扣解工食俟本官另募則在各  
州縣不徒養無用之兵在本官自可得見在之餉其挑揀教訓又  
一任本官爲之臣惟樂觀厥成并不掣本官之肘此外臣有清出  
屯軍所給鎗銃炮藥一一精備正當分營團練之時撥給本官一  
千名與民兵合練俾成勁旅三千以裨征剿茲時將三月臣昨有  
鳳翔之行臣尙恐簡訓或有未周不肯輕試其銳雷防省城後恐

乾坤正氣集

卷四十九

五

豫賊西犯秦賊東逸惟令本官於潼藍之關張聲設疑乘敵擊惰  
戒勿輕與接戰蓋臣方期本官以大用而不敵命其汲汲漫爲也  
今蒙行查據本官申報選收各州縣解到民兵九百六十名本官  
自募官生材勇九百七十名并臣所發屯軍九百六十二名計數  
幾於三千不爲不多閱日已過八十不爲不久又謂訓以百日之  
功可効半臂之力臣謂本官旣從實地做實事卽百日之期不可  
無限本官肝膽意氣勃勃無前皇上惟執本官之言以責本官之  
效苟能裨補廓清卽稍需時日非遲也乃本官又以茶馬關防功  
賞三事爲請臣維衝突須馬故剿兵皆以馬三步七爲率本官銳  
意殺賊不欲以尋常鄉兵自格且云所選官生兵丁併屯兵內熟  
練弓矢精通劍戟善於馬上技藝者屈指千餘皇上於本官旣不  
惜破格鼓舞將爲各省練用土著之倡豈斯此茶馬千匹使本官

詘於前鋒而安於後應也臣所那奏遠市西馬千餘匹見在募到邊丁數百虛策以待其未到而需馬者猶多本官亦知臣馬無幾不能分給故特求茶馬應請敕下兵部將本年解京茶馬二千匹內撥給本官一千匹以展其才此一千匹之路費草料該銀三千五百兩亦祈併給本官以充數十日草料之費其以後不足者臣卽以剿餉動給至於本官文移動關錢糧兵馬須有關防應請敕下禮部鑄頒若夫功賞銀兩臣標下原無額設本官之兵但能立功豈患乏賞臣請於剿餉內一體那給似不必另請專設也再照本官原請募兵三千今三千內有臣發屯軍一千名臣祇以屯軍亦皆土著又不煩措餉而其人之年貌勇力不讓募兵且器械精備似尤過之臣故撥令並用如曰下臨敵剿禦募兵果遠勝於屯兵臣願爲本官另行措餉使其募足三千之數且不但三千卽盡

乾坤正氣集

卷四十四

五

皇上所給之剿餉臣悉倚本官俱募土著以速奏蕩平用力逸而收功大又不至釀費貽憂臣何憚而不爲也至於因用民兵扣取其原有工食臣祇以既有此民兵有此工食卽其兵不若本官自募之兵而其工食豈不可爲本官自募之餉莫非地方之物力莫非朝廷之錢糧何必剿餉始爲餉而付此項於虛糜也此實臣區區節縮苦心然亦本部文私鬪公戰之意而行之耳統祈聖明鑒裁施行謹奏崇禎十年九月初六日奏十月初一日奉旨該部看議具奏

### 報降丁掘獲窖銀疏

題爲續報降丁掘獲窖銀事臣昨提兵於郿寶間擊剿出棧諸賊收獲降丁番山鷓等據番山鷓供先年隨闖賊時曾在扶風醴泉地方埋銀二處醴泉埋銀處所記識不真扶風城外埋銀處所至

今猶能記憶乞行差人押赴該縣掘取等情隨經臣差官押番山  
鷓至扶風同該縣知縣宋之傑掘獲銀八百九十三兩解至軍前  
臣給賞各降丁一百兩餘銀七百九十三兩發監收聽收貯充餉  
業經臣於報捷疏中附奏在案續據番山鷓稟稱醴泉理銀處所  
雖記識不真若至彼相度形跡尚可掘挖等情據此臣票委參謀  
武清周押同前往醴泉縣同該縣印官掘取去後今據該縣知縣  
韓景芳申稱蒙委武清周押降丁番山鷓等到縣卑職卽同委官  
并降丁番山鷓等至窖銀處所掘出原窖銀兩眼同秤兌共二千  
九百一十三兩九錢封畏貯庫等因據此臣行令於內給賞山鷓  
併衆降丁劉君槐等三百五十兩俾製買甲馬隨征報効其所餘  
二千五百六十三兩九錢貯庫爲照降丁番山鷓的名拓攀高乃  
前俘賊闖王高迎祥心腹至戚而其智力亦餘迎祥相頡頏者也  
乾坤正氣集

卷四覽古

美

迎祥於八年九月屯擾西鳳其所劫掠之贖擄載不盡者悉穴藏  
於拔釵穿闕之地諸賊皆不與知惟令攀高知之迨迎祥成擒於  
盩厔而攀高遠遁於漢南今始從棧道出峪感臣不殺其夥賊來  
山虎之恩率衆來歸遂舉迎祥所瘞之金一一首出掘獲查窖銀  
處所於扶則在郊關之外於醴則在園野之間乃攀高等記憶旣  
真不敢私起頗能守法輸誠臣用敢卽動原銀從優給賞俾製買  
甲馬隨征効用由此或能格面格心得其死力爲我用亦未可定  
除給賞各丁外先後二次共存銀三千三百五十六兩九錢俱應  
充餉或作軍前功賞之需統俟事完同兵餉彙冊報銷謹題崇禎  
十年九月十三日具題十月初八日奉旨知道了先後掘獲銀兩  
著充兵餉賞功等用彙冊報銷該部知道

奏爲微臣清屯事竣三秦永利已與彙報前後清出實在兵糧數目事竊惟清屯之舉臣不揣謏劣謬欲修舉祖宗久湮之法於患貧患寡之時爲足食足兵之計矢志殊迂用力匪易今幸邀寵靈克副愚忱竟臻成效以兵則向欲爲省會四門各索乘障之三百人而不可得今則於前後左三衛清出實在營軍九千三百三十八名於右護衛除旗軍校尉七百八十名外清出實在修工軍二千五百一十七名悉年力精壯營軍已分六營團練修工軍已撥令增築會省三關矣此臣清出實在之兵數也以餉則向盡四衛之歲入支都司衛所廩俸雜費及標下家丁二百月餉奇兵千人加糧而猶虞不足今則於前後左三衛清出課銀一十四萬五千二百四十二兩零於右護衛清出本色麥米豆一萬三千五百五十六石零今夏課銀已將完而本色亦見行徵收至原兌各軍

乾坤正氣集

卷四言九十四

七

未起課之地應納丁條草馬等銀共四千五百八十一兩零猶不在內此臣清出實在之糧數也是役也兵不煩募徵芻稽之斷殘之尺籍遂得萬二千餘修我戈矛事乃畚鍤在將來終不敢謂戰則不足在今日已可謂守則有餘餉不假摻派第復自好究之橐囊遂得一十五六萬兩石金盈於帑粟充於庾在目前可支繁匱之軍興在後日可裨富強之永計矣至於酌其便於人情畱其餘於地力故當經畫之初已無難於慮始卽經撓亂之後竟無害於觀成蓋臣籌度逾年確有主見經營數月斷在必行遂使二百載相沿之弊竇溱滌無餘億萬年不涸之利源流通罔旣臣於是益信天下無不可爲之事而自今已往凡有心爲朝廷任事者亦不至以臣之多事無成爲戒矣然其所以成始而成終者非臣一手一足之力所能辦除原任西安府推官今行取王鼎鎮當臣初舉

此意本官卽力贊其可行及奉臣檄則直窮蠹壤之根不避羣小之忌精心擘畫定力擔當始事之功獨居其最臣已於第一次清屯疏內題敘奉有準與優敘之旨聽部考選外如分守關內道副使李虞夔接管清理不徇情面至於軍戶地戶爭訟之案情僞百出剖斷公明至各衛之冊籍繁多每衛輒至十餘本而分郡分邑縷析於三十六州縣者每本輒經數造而續清續發每州縣又輒至數番紛紜浩繁本官必經手經目勞績鮮儔敘酬宜厚此外督徵州縣當屯政脩明之始能加意奉行有裨軍國大計與尋常歲額遵例催辦者不同應照完課第次併行輒敘內如長安縣知縣賈鶴年清操軼俗催徵有法首先報完夏課以爲諸有司之倡咸寧縣知縣宋祀畱心督催夏課遵限報完鄂縣降級知縣張宗孟悉心調劑使軍佃悉得其平不急爭一日之早完獨深圖長久之乾坤正氣集

卷四百九四

天

至計而夏課報完亦不落後渭南縣署印西安府同知王明福奉文之初有一二奸徒妄思延抗本官擒首惡枷責示警旬日之內遂報完三千餘兩蒲城縣知縣田臣正項錢糧不逾夏而征完六分於屯課尤竭蹶從事遵限及額同州知州羅曠守潔才練使梗頑頓化課額能完華州知州鄧承藩本州額課雖數僅五百七十餘兩而夏季遂完解八分亦見勤敏與平縣知縣閻堯章額解亦僅數百而鼓舞軍佃有方使人皆知納課之便臨潼縣知縣張鼎課額頗多完將及數以上各官均請議敘以示鼓勵者也其餘州縣或解數儘多而準之原額尙不及半或解雖及額而按之銀數原自無多又或解將及額銀數亦多而始則奉行不力近於怠緩繼復肯繁未得涉於張皇臣俱不敢濫舉所有清出軍糧臣謹造冊奏報再清出屯課銀粟共十六萬餘數固不爲不多然較國初

尙不敷原額秦方兵餉兩細臣搜剔有此自茲以往庶幾經理有方侵牟永絕以秦兵衛秦地卽以秦餉養秦兵凡遇軍興不至動煩呼籲可永寬聖明西顧之慮若此項銀粟則必不宜別有挹注也蓋四衛軍糧各有定數有一軍卽應有一糧有一糧卽應補一軍必軍糧漸如原額乃能漸復先朝富強之盛內且有額支丁條草馬司衛雜費等項又營軍加糧軍役工食與夫延寧各邊班價俱於此中取給又向蒙聖明準臣設標兵三千除當年給臣問金裁站新餉六萬兩之外以後着臣自行設處臣稟奉明旨至今未敢另有陳竇亦應以此項接支頃戶兵兩部計議會剿兵餉該給臣餉銀二十三萬四千兩止撥給臣本省裁站并晉蜀均溢銀一十八萬七千餘兩尙不敷銀四萬六千有奇以臣見抽屯餉緩議昨臣通計剿兵原列標兵在內亦自應以此項通融奏抵又省會

乾坤正氣集

卷四百九四

无

重地南北西俱無關城東關有城亦低薄不堪臣見行分守道督成長兩縣分工脩築夫役卽用右衛軍丁而鹽菜等費亦於此項支給又打造軍器獲捷賞功臣衙門併無額設亦應於此項那用則此屯課自各項支銷外無多贏餘卽欲招補額軍已不能不需之異日況軍佃良頑不一未必一一通完臣若不預爲陳明當茲司農仰屋之時或取臣所清出之課另充別項酌濟則不但使秦地空虚如故且併有名無實之原額亦永不可問是臣徒費一番苦心於秦無益而反害之矣至於十面合剿之舉仰借皇上天威諸臣謀力果能刻期蕩平則自崇禎十年以後秦與各省之剿餉俱不煩戶部撥給卽或餘孽猶存尙費驅殲臣有此兵有此餉臣爲悉心料理自可支撐防擊臣亦必自崇禎十年以後再不敢仰求接濟於戶部此則臣之所可自任而敢昌言於聖明之前者也

統祈鑒照施行謹奏崇禎十年九月十三日具奏十月初八日奉旨據奏清屯既竣裕餉足兵孫傳庭具見實心任事該部看議具奏

題破災地方蠲免錢糧疏

題爲遵旨查明災重地方仰請蠲緩事卷查崇禎十年二月初三日準戶部咨該臣題爲秦民窮困已極相率走險可虞懇特沛殊恩奠安危疆事該本部覆題本年正月初十日奉旨覽奏秦省災荒至極民不聊生深惻朕懷亟宜賑恤但目今部庫匱詘茲特發御前銀三萬兩再著太僕寺發銀二萬兩光祿寺發銀一萬兩該部撥給車贏著忠勇營中軍李應忠星夜押解會同該撫按相度緩急設法救濟務令飢民得沾實惠事完報銷如奉行不善及乘機作弊者據實參奏仍查災重之處停徵錢糧并飭地方有司實

乾坤正氣集

卷四百九函

三

心拊循不得虛應故事欽此欽遵移咨前來除監臣李應忠齋到賑銀臣等會議散賑并分發牛種先後事竣前已造冊具疏奏聞外其十年分災重之處臣等仰遵明旨檄行布政司分行各道府確勘去後節據分巡關南關西河西商雒潼關各道并西安漢中平涼鳳翔鞏昌等府及興安州各巾報所屬州縣災傷有值亢旱夏麥無收秋禾未種者有雖佈種成苗被冰雹打傷者有人民被寇殺擄逃散未能佈種荒蕪者有苗秀將成被寇殘毀者或請賑恤或請蠲緩等情到臣臣復批行布政使覆勘彙報去後十月十六日準戶部咨該監臣李應忠奏爲微臣賑奏事竣恭報散過銀數并查蠲緩錢糧仰祈聖鑒事九月十七日奉旨據報賑濟秦省飢民六十二處已盡霑實惠并節存改助牛種蠲緩勘明續奏知道了內稱印官有棲身無地俸薪全無者該撫按確查廉善分別

勸勉俾得堅心愛民以昭朝廷體羣臣至意該部知道欽此欽遵抄出到部移咨前來已經備行遵照去後今於十一月二十二日據該司呈詳到臣該臣會同按臣謝秉謙黃希憲議得軍旅飢荒乃從來偶值之變而秦則歲以爲常臣等拯救無能乃蒙聖明注念危疆軫存遺子大沛恩膏既使野殍溝瘠咸荷更生猶慮災重地方窮民應輸錢糧不能辦納令臣等查明停徵雖古聖人如傷在抱何以加諸臣等祇奉明綸分行踏勘如商雜之累歲荒盜漢中之斗粟兩餘鞏昌之罹寇最久與興安之巖邑兩陷臣等先後疏報俱在御前自應併以災重微恩其他西鳳平延各州縣或殘破之極一望邱墟或殺戮之餘呻吟遍野或民逃寇踞東作未與或夏旱秋雹西成罔獲臣等查覈分別奏聞除西安屬地有寇警稍息二麥頗登惟夏末稍旱併臨洮府屬雖經寇擾被災未甚與

乾坤正氣集

卷四百九十四

三

凡稍可徵輸州縣俱不敢槩議蠲緩外查得屢經寇殘地方與夫旱雹災傷最甚之處如西安之山陽鎮安商州商南雒南漢中之南鄭洋縣城固西鄉沔縣褒城畧陽鳳縣鞏昌之階州文縣兩當成縣西和漳縣秦安平涼之涇州崇信華亭鳳翔之隴州麟遊興安并所屬之白河紫陽洵陽平利以上三十州縣或屢被寇殘或酷遭旱荒被災一等應將十年分存留錢糧并新舊軍餉及雜項公費羊價料價匠價并衛所屯派軍餉俱蠲五分緩五分鞏昌之隴西寧遠伏羌秦州禮縣清水徽州并洮岷西固城三衛所平涼之靈臺隆德鎮原平涼莊浪鳳翔之扶風汧陽延安之安塞保安延長甘泉宜州延川慶陽之寧州眞寧安化合水以上二十四州縣并衛所營堡曾經寇掠民多逃竄地多荒蕪卽間有耕種又罹旱雹被災二等應將十年分存留錢糧并新舊軍餉及雜項公費

羊價料價匠價俱蠲三分緩二分徵五分西安之耀州同官永壽長武三水淳化同州藍田朝邑韓城蒲城郃陽澄城鳳翔之寶鷄鄜縣岐山鞏昌之通渭安定平涼之固原靜寧慶陽之環縣延安之鄜州膚施中部宜君雒川綏德安定清澗米脂葭州神木府谷吳堡以上三十四州縣并各衛所營堡亦經寇擾民殘地荒又值夏旱秋成甚薄被災三等應將十年分存畱錢糧并新舊軍餉及雜項公費羊價料價匠價俱蠲二分徵八分至於石泉漢陰寧羌三州縣俱新經寇陷百姓殘傷已極十年分存畱錢糧并新舊軍餉及雜項公費羊價料價匠價俱應盡蠲以上所議蠲緩止及存畱錢糧與新舊軍餉雜項公費羊價料價匠價數項此外有祿糧爲宗藩急需民運爲邊軍急需站價爲驛遞急需預徵軍餉爲剿兵急需俱未敢槩議蠲緩至監臣疏稱印官有棲身無地俸薪全乾坤正氣集卷四十九四

無者蒙旨著臣等確查廉善分別勸勉臣等查得西安府鎮安縣知縣秦來奚力捍空城賊偏境內猶能出奇斬馘已經兵部敘錄先因薪俸無給至家口不免嗷嗷臣曾括金四十兩以贍之鳳翔府隴州知州支應麟受事該州當屢經殘破之後無復州治該本府知府熊應元條議修復督臣洪承疇發兵鎮守一時在事諸臣各有捐助臣亦搜捐贖二百餘金以佐工料今城工報竣而拮据綱繆賴該州之力居多扶風縣知縣朱之傑委署之初該臣官舍民廬無復存者本官代庖數月勞來有方未幾而百堵具興市肆如故邑治漸有可觀臣因以本官題陞該縣以償其前勞且以鼓其後效平涼府靈臺縣知縣敖法貞方履任時賊猶踞城內本官受事於城外之南堡及賊漸引去本官招集居民繕葺城垣置備守具殫竭心力厥後大寇屢犯其境竟能固守崇信縣知縣高

斗垣歷殘邑二載臥薪嘗膽形神俱瘁今城已修復廢墜可徐埃  
興舉而本官以憂去之數官者艱難困苦既已備嘗屨勉勤劬復  
能自効與廉善二字有當用當遵旨勸勉內高斗垣雖以憂去而  
勞不可沒故並列以聞至於見在各官倘能初志不渝末路愈振  
以廉善始復以廉善終是在各官之無棄而勞矣此外凡城經殘  
破之處官之俸薪未盡無給而棲身實苦無地者尚有山陽永壽  
華亭麟遊涇州襄城漳縣秦安成縣階州文縣兩當石泉寧羌漢  
陰等處第其官或經參處或久缺未任或新任而廉善未能自見  
臣等所以分別勸勉者亦不能不徐埃其後而官解俸薪等項現  
飭各道府從長計議另疏題報爲此謹題崇禎十年十二月初十  
日具題十一年正月二十六日奉旨該部看議覆奏

題按臣錢守廉郵典疏

乾坤正氣集

卷四十九

三

題爲勵勞臣以光大典事準吏部咨遵奉明旨行據陝西布政司  
呈詳到爲爲照臣忠莫大於致身主恩特優於死事若其勞在邊  
疆尤宜上邀殊典該臣看得前巡按陝西監察御史錢守廉立朝  
著譽諤之風報國矢捐糜之志有懷慷慨匡扶豈異人爲殫力澄  
清髮膚總非我有入關值寇盜擾攘之日縱橫盡封豕長蛇按部  
除郡邑殘破之餘來往悉青燐白骨乃守廉罔辭險阻備極辛勞  
既巨細靡不身親復安危引爲己任籌兵籌餉將蓄而肌骨爲銷  
議撫議征擘畫而心神幾瘁憤將士之驕玩成習直欲以繡府代  
尙方痛我師之延悞罔功恨不以驄馬當汗血故擒鬪會於盤屋  
實守廉畫策於火攻收滿寇於延安又守廉自受以戎索此守廉  
勞績昭昭在人耳目俱有塘報可稽然守廉致病致死之繇不真  
在是也兼任三年之巡閱勞且晝於簡伍稽儲親覈兩鎮之邊防

歷馳驅於衝寒冒暑故廊宜之轍未返馬上血傾數升比榆固之役方周榻間食惟幾箸迨勉竣掄才之典棘甫撤而守廉遂不起矣按臣謝秉謙接任謂守廉以死勤事誠不忍沒其成勞亦臣所真知灼見若非破格優卹非所以勵臣節而昭國典至守廉生平才品與夫察吏安民觀風問俗諸善狀爲巡方職業之所應盡者臣不敢一一縷數也查得大明會典一款凡在京出外文武官員不拘品級其以死勤事者卹典取自上裁今守廉功在秦疆臣謹會同按臣謝秉謙合詞具題伏乞敕部議覆施行謹題崇禎十年十二月初十日具題十一年正月三十日奉旨該部查例覆奏

移鎮商雒派防汎地疏

題爲微臣遵旨督兵斷截商雒恭報到汎派防情形仰祈聖鑒事照得流賊煽禍十載勢益披猖臣實不勝痛憤於十一月初十日

乾坤正氣集

卷四十九

五

具有微臣素負癡腸一疏以秦寇適去臣兵少集輒自請出關剿賊方在候旨本月三十日準兵部咨爲請旨責成剿賊第一事令臣兵斷截商雒十二月初三日又準兵部咨爲緊急軍情事令臣速赴所派地方臣一面咨覆兵部一面厲兵秣馬發撥遠探豫處各賊西向情形間本月二十一日又準兵部咨爲兵機介在毫髮賊勢急於奔湍申令扼剿謹具題達事內云賊旣自南而北勢必自東而西或涉南陽走內淅則商南受其衝或過汝州走永盧則雒南受其衝苟一入商雒而萬山環之岐徑錯出出蓋田則通鄠杜出山陽則達鄖房出興安則奔蜀漢而我官兵追之不及截之不能又散漫而無可如何故臣前議陝撫堵商雒實當賊首衝而潼關一路有晉兵橫截陝靈卽諸賊不敢正視此形格勢禁用兵之理有不可易者也本月初三日接得陝撫孫傳庭微臣素負癡

賜之揭自請出潼關殺賊而欲令監軍道張京領王洪祖大弼之兵別出鄖西此或拜疏在未見責成之前可耳若既見明旨責成該撫宜急趨商雒預堵賊衝等因移咨前來準此臣於二十四日親督官兵繇藍田赴商雒議以後左營都司李國政統領馬步官兵九百一十三員名屯兵炮手四百四十四名署中軍事旗鼓都司王國棟統領馬步官兵一百七十員名奇兵炮手四百二十名直抵商南以堵內浙之衝以甘營副將盛畧統領馬步官兵一千五百八十八員名屯駐雒南以堵永盧之衝以原任副將遣戍趙大允所統馬步官兵六百八十八員名併原任副將王根子所統漢土官丁一百八十四員名原任參軍解文英所統馬步官兵五百九十六員名守備張文耀所統馬步官兵一百四十二員名操司孫枝繡所統馬步官兵四百四十二員名俱駐商州居中四應

乾坤正氣集

卷四十九

五

及臣至藍田據前發河南及鄖西塘撥報豫楚各賊尙未有西犯情事臣因念商雒米糧騰貴臣前發商雒道屯課銀三千兩所買糧料不能濟多兵駐防之用臣因暫駐藍田二日又發屯課銀令該縣羅買料豆令旗鼓都司王國棟同奇兵千總董朝薦分派騾軍轉運查臣原買運騾僅二百餘頭計程運至商州六日一轉每次運豆一百五十石以供千馬六日之料尙爾不足其兵士所需糧米臣先行藍田糴買併屯課折納在倉者約千餘石俱不及運臣因令趙大允等兵於藍田暫住其盛畧甘兵見在潼關臣亦行令暫駐關上俟發李國政王國棟各兵赴商南之後卽調趙大允等兵齊赴商州盛畧兵亦俟臣另檄至卽赴雒南臣親提李國政王國棟各兵於二十七日自藍田入山從七盤坡攀援而上側身一望萬山如簇行旅久絕草木蒼翳併所謂羊腸鳥道不可辨識

臣棄馬而徒同官兵披荆捫石躡雪凌冰下窄坡關經藍橋每至險滑不能定足之處左右爭掖臣不欲使各兵將窺臣之德輒皆麾去行數十里所過村落廬舍無一存者晚露宿牧護關燐火生於寢處馬溺時濺襟裾軍中踐更之卒於數武外喧傳虎過者至再臣擁裘與隨征健丁十數輩危坐達曙呼早炊無所具僅脫粟一盂鹽蔬數莖其諸將士枕戈懸斧之苦固可知己洎陟秦嶺道枕南巖積陰險滑更甚臣雙足蹒跚欲踣者幾再臣益賈餘勇以示諸將之稍懈者再行竟日近商州僅一舍尙有人煙比及郊關亦以賊火成墟始見三五老稚行立道左然皆疾首蹙額似畏多兵之至不能相容者既抵州詢商南城內居民約僅百家難以駐兵查有商雒鎮龍駒寨兩處居商州商南之中距州百里猶可運糧接濟臣因將李國政王國棟所領兵馬分屯兩地擇賊焚餘

乾坤正氣集

卷四百九十四

美

之屋稍存椽瓦者居之俾於鄖涿兩路遠差哨探如商南以東但有賊耗李國政等兵卽馳詣商南截剿一日可至其趙大允等兵與盛畧之兵亦俟賊警稍西大允等兵卽從藍田徑馳商州盛畧兵卽從潼關徑馳雒南俱兩日可至兵在內而賊在外兵在近而賊在遠汎地已經派明聞警卽可遄赴庶於扼堵旣無悞而亦不自致窘困若關門重地雖陝靈已有晉兵我兵猶宜設防臣行令原派防鞫部參將王永祥統領馬步官兵四百二十七員名仍與潼關守兵協防至漢南大寇雖遁入川中而遺孽尙多與土寇相倚爲崇如畧陽階州城固洵陽白河之間或報千百甚或報萬餘臣雖行各該道相機剿撫卒難盡滅且漢中米糧騰貴尤甚而從見今雲棧猶梗販運難通臣行令贊畫司務陳繼泰統民兵二千名疏通棧道給以三月餉銀共九千兩卽作糴本販運米糧入漢

接濟外有原任參將田時升所統馬步官兵八十九員名并所督練屯兵一營及司務廳屯兵九百六十二員名與各營屯兵俱畱防省城臣到汛派防已定謹具疏馳報至臣斷截之方畧請預陳焉方臣未至商雒而商雒之情形在臣意中及臣既至商雒而商雒之情形在臣目中其在臣意中者賊無處不可入我無處可防故臣謂惟有困賊於山之外擊賊於山之內而已其在臣目中者賊無處不可入我無處可防如故而臣所以算賊者則似更進一籌固卽該部所謂臣先入伏兵待賊毋使狡賊先入爲伏待兵之說也蓋商山之險阻荒苦我與賊共之臣旣提兵先入則以逸待勞以靜待動之勢猶在我較扼賊而困之山外取效捷與索賊而擊之山內用力易故或賊繇承虛入雒南或繇內浙入商南臣必能迎頭擊堵卽或繇承虛內浙各山峪紛出之岐徑奔竄於不商

不雒之間然未有竟不商而突興漢竟不雒而越藍鄂竭臣之愚卽不能滅此朝食乃知部議所云務必驅之東出俾禁旅理臣與豫晉之兵收功一戰臣不敢不惟力是視第賊衆我寡賊合我分故該部復議調督臣洪承疇兵與臣兵合勢斷截倘督臣旦夕果至計乃萬全然今川事決裂督臣或不能忽然東返而臣亦不敢以單薄自諉乃臣所慮者陝靈橫截之兵未必能代臣塞崢函之罅漏誠以在人者不敢恃故臣仍以韓郃之兵與潼兵協防關門臣所無可奈何者鄖防之南竹房等處接壤與洵臣鞭長難及不能並驚賊或自楚地從彼中關入在臣卽可卸責而藩郡震驚又在所不免然此自有治臣鄖襄之汛兵扼之於前督臣漢興之剿兵殲之於後臣猶不能不鯁鯁過計則臣爲封疆無己之私衷也至於此中駐兵無地運糧最難臣惟望天心悔禍速滅此賊臣何

敢妄冀立功不然則望大兵星馳電掣速驅各賊早至荒山臣得以未疲之力與之一決可俟倖寸豎仰報聖明亦臣之所願也伏乞垂鑒爲此謹題崇禎十年十二月三十日具題十一年正月二十二日奉旨據奏到汛派防情形知道了所陳方畧孫傳庭著卽相機扼賊毋致狂妄仍飭督治諸臣力遏鄖襄以障藩郡如玩悞誘卽一併重治該部知道

辭加級銀幣疏

奏爲異數殊恩萬難祇受事崇禎十一年正月初五日準戶部咨該臣奏微臣清屯事竣三秦永利已興彙報前後清出實在兵糧數目事一疏該本部覆題十年十一月初六日奉聖旨李虞夔加一級賈鶴年等俱紀錄孫傳庭清屯充餉勞怨不辭著加一級仍賞銀三十兩紵絲二表裏用昭激勸今後各撫務以秦撫真心實乾坤正氣集

卷四百九十五

美

事爲法不得自狂置詘徒煩仰請欽此欽遵抄出到部移咨到臣臣跪誦明綸不勝惶感伏念臣至謏劣誤蒙皇上簡擢鎮撫秦中今幾二載方臣叱馭入關時秦徧地皆寇而問兵無兵問餉無餉臣惟照臣所請設兵數招集訓練卽以所請同寺軍站等銀六萬兩催解支給東援西剿亦累奏微功然兵力旣單餉且虞斷寇氛方劇迅掃難期臣日夜展轉恨不折肢爲兵糜骨作餉以逆靖狂飈早紓宸慮且以振弱濟虛俾百二重關可永恃無虞臣因查西安前後左三衛併右護一衛有軍如許固一一可勾每軍有贍田一頃固一一可覈臣竊歎國家兵餉莫大於是乃日疾首攢眉憂兵憂餉卽用是多方稽討一力擔承溯流窮源循名責實幸藉皇上寵靈一時道府州縣諸臣靡不協心共濟得成厥功雖於兵食大計不無裨補然爲家國應有之利臣子應盡之職乃蒙皇上嘉

許過甚寵賚非常謂臣清屯充餉勞怨不辭加臣一級仍賞銀三十兩紵絲二表裏用昭激勸且俾各省撫臣以臣真心實事爲法臣聞命自天措躬無地夫以軍衛民以屯養軍原祖宗富強永圖祇以法久弊滋盡歸隱占致難究詰臣受封疆重寄何得悠悠瞻徇不一清釐卽獨勞衆怨皆臣所甘况自有此舉在臣旣幸展布有資不苦襟肘露在地方之人亦以緩急足恃謂可席慶蒙安臣且一勞永逸有德無怨矣而更以勞怨塵聖慈之矜憐叨明廷之晉錫則於臣謹涉欺罔而於君恩爲逾格况臣自受命撫秦之初曾蒙召對平臺親承真心實意之聖訓茲卽以區區樸誠荷皇上之洞鑒昨於臣奏報之疏旣嘉臣以實心任事今於戶部敘覆之疏又嘉臣以真心實事且俾各省撫臣以臣爲法臣何人斯蒙皇上知遇至此臣生旣非虛死且不朽况臣撫秦無狀叢慝實多

乾坤正氣集

卷四頁九

无

日者漢陰之失不卽加臣以斧鉞僅薄示降罰若復以負罪之身冒茲寵異雖聖明固有不測之恩而臣愚實稟非分之懼伏乞收回成命準臣辭免使臣心稍安臣罪稍追臣無任激切屏營待命之至爲此謹奏崇禎十一年正月初九日具奏二月初十日奉旨孫傳庭清屯著勞敘賚已有成命不必辭該部知道

議蠲漢中錢糧疏

題爲漢郡復值災荒亟請拯救事照得漢中親藩重地無歲不罹寇患而凶荒亦因之去歲之春斗米入錢窮民饑餓死者不知凡幾仰賴我皇上發帑賑濟一二未盡子遺幸得少延旦夕以冀天運之轉移不意入夏早魃爲虐二麥俱枯及夏未得雨稍種穀黍晚田幾幸薄收乃八月間闖將過天星等九股大寇復遭蹂躪迨十月去蜀西成已過顆粒未登兼以棧道久梗販運阻絕卽今斗

米價至一兩且無處糴買臣每詢之彼中差來官役僉云在城在野殍殮相望白骨成邱臣心如割無計可援幾擬再懇皇慈發帑賑濟又思聖澤卽可頻徼而涸魴亦難久待展轉再四惟有疏棧通糴一策尙可以濟燃眉適臣標下贊畫司務陳繼泰扼腕時艱條畫具申欲以疏棧通糴爲己任臣卽據本官詳議令統領官兵二千名疏通棧道臣仍檄布政司轉行西安府借動屯課預給本官三個月餉銀九千兩內以四千五百兩給散各兵充餉以四千五百兩作糴本易買米糧驢頭賑運接濟臣又念棧道屢經流寇奔突人煙斷絕各兵應用器具俱宜自行攜帶仍檄西安府動屯課銀二百兩給賞各兵以爲製辦之資鼓勵迺往令於棧道揆程屯駐更班轉運兼令設法招勸附近民人給與糴本同各兵往來負販除糴本之外得有利息卽給各軍民自潤使樂於從事本官

乾坤正氣集

卷四百九

早

已於十年十二月二十六日於西安府領銀督各兵從涇成取齊前往至十一年正月初五日又接按臣謝秉謙手本議再借銀數千兩易買米糧兼買騾驢另行委官設法販運臣念彼中饑荒至極增本廣運多多益善又行布政司復奏銀四千兩行分守關西道李公門轉發鳳寶岐郿等縣易買米糧仍令該道移駐鳳縣令鳳翔府通判陳元勛移駐寶雞催督各縣將買完米糧運交鳳縣署印官收貯該道卽設法雇募騾驢或募夫轉運并令漢中道府急速設法給文貨價前來接運或鼓勵士民自行販運至漢報數在官聽該道府卽酌定出糴之價除原本之外營出利息亦聽販運軍民自潤然此兩運糴本若卽分給漢民作賑勢難遍及故臣責成官爲買糧督兵接運又招致民人負販俾其絡繹周轉源源不斷則所濟於漢民自多至於彼中一切錢糧已萬難催徵業

據布政司申詳已俱有遵旨查明災重地方一疏議將漢屬各州縣本年各項存留并新舊軍餉及雜項公費羊價料價匠價分別蠲緩內議寧羌州盡數蠲停南鄭洋縣城固西鄉沔縣褒城畧陽鳳縣俱蠲五分緩五分其存留軍餉等銀外尚有祿糧民運站價俱未議及今該處凶荒至此臣恐所緩之五分與祿糧民運站價卽不議蠲亦難望其完納似應全數蠲免之爲愈也臣謹會同按臣謝秉謙合疏具題伏乞敕下該部覆議施行爲此謹題崇禎十一年正月二十五日具題二月十七日奉旨據奏疏棧通糴招勸賑濟知道了所請蠲緩事宜該部看議速奏

奏報甘兵廩餉疏

奏爲甘兵廩餉久有成額微臣接管委難釐正謹具疏奏聞以祈聖鑒事崇禎十年十月初八日準兵部咨該臣題爲恭報甘兵抵

乾坤正氣集

卷四十九

聖

鳳臣遵旨調度併請防擊一定之責成以便遵守事該本部覆題本年九月初八日奉旨督撫功罪一體協力夾剿旨申飭孫傳庭著與洪承疇等彼此同心隨賊東西殲堵早奏蕩平豈得分別以滋規卸若失時債事國憲具存甘兵仍聽孫傳庭調度毋庸又更甘兵廩餉事宜作速釐正欽此欽遵抄出到部移到臣臣除臣與督臣洪承疇協力同心隨賊殲堵不得分別規卸及臣調度甘兵祇遵明旨外臣隨將甘兵廩餉事宜移咨督臣會議去後至十一月十六日準督臣回咨內稱甘肅官兵本部院原定則例係二月間調到之初卽在臨鞏階文洩岷徽成地方米豆價騰自應照各營事例一體支給今各官兵旣改聽貴院調處皆駐在西安潼關渭華涇三鳳翔地方往來不過二三百里力不苦於奔疲且地方米豆價賤糧餉自可節省以勞逸饑飽遠近之勢較之自不能以

相同甘兵與各官目的量釐正等項應聽貴院裁酌相時隨地先爲釐正另行會題等因準此該臣看得甘兵乃督臣三邊四鎮所統轄之兵而臣則隔鎮之撫軍也彼自督臣軍前發臣標下其所應支廩餉臣卽未準督咨亦不便歧視况督臣會以則例移臣臣安得不照督臣則例支給今該部據臣奏報覆請釐正奉有明旨正當束手憂餉之時苟可以酌盈濟虛豈非臣之至願第揆之情理釐正之舉臣實未可冒昧故臣遵部咨移咨督臣會議及得督臣回咨調甘肅官兵二月間調到之初在臨鞏等處米豆價騰應照督臣各營事例一體支給今聽臣調度皆在西安潼關渭華涇三鳳翔地方米豆價賤自可節省應聽臣酌量釐正夫去歲春初臨鞏米豆價猶減於西鳳後因大兵久駐價始日騰恐臨鞏貴而西鳳賤之說實非定論卽以勞逸饑飽遠近爲言臣奉命措

乾坤正氣集

卷四十五

聖

兵亦思減此朝食倘遇赴湯蹈火各兵豈得不往卽便解衣推食在臣豈容少靳若任其逸不妨聽之饑而第知減餉俟其勞方可許之飽始爲增餉又復鯁鯁焉較量於遠近以爲之哀損其何以使各兵樂爲臣用而得其死力乎且各兵之在西鳳距甘鎮不較在臨鞏倍遠乎又臣隨臣斷截商雜非卽向來官兵所裹足不前之地乎其勞逸饑飽遠近之處又何如耶况從來軍餉由少得多則以爲固然由多得少則以爲該然臣卽慳吝存心刻薄成性實未敢以三軍之怨讟爲可嘗試輒貿貿然輕議釐正也至於臣之所釐正亦不少矣各兵初屬臣調度時每月應支餉銀七千二百五十餘兩臣於鄜縣親點一過復行監軍道王文清同總統副將盛畧逐一揀選汰去官目三十一員兵丁四百一十四名馬騾七十四匹頭每月共減支銀一千五百六十餘兩是臣之所釐正也至

臣約束各兵不得擾民間一米一蔬各兵洗心滌慮以奉令惟謹是亦莫非臣之所釐正也且樞部計議兵餉督臣之兵與臣之兵原無等差今臣標兵廩餉不敢槩拘督臣則例而甘兵廩餉似不得不仍如督臣則例支給矣至臣之兵數原應一萬今計臣見在兵數卽除去甘兵尙在一萬之外刻下臣卽以臣練就兵馬營制及分營將領詳列奏報稍俟二月合剿後臣擬將甘兵繳還督臣如督臣不用則應發回甘鎮臣已移督臣咨會矣伏乞聖明垂鑒爲此具奏崇禎十一年二月初二日具奏三月初三日奉旨該部看議具奏

乾坤正氣集

卷四百九十四

聖

